

9. Rex uxorem suam gravidam intuebatur, sicut terram, divitiis repletam, sicut *samim* arborem, in qua ignis latet, sicut *Sarasvatim* fluvium, cujus aqua sub terra fluit.

10. Peregit ille sapiens justo ordine cærimoniam post conceptionem et reliquas, cum magnificentia quæ congrua erat tum amoris ejus erga uxorem, tum animi altitudini, atque divitiis quas e regionibus extremis accumulaverat.

11. Quotiescunque rex domum reverteretur, lætus conspexit uxorem, ob uteri, a summorum deorum particulis inhabitati onus cum difficultate e sella surgentem, manus ægre jungentem, oculisque vacillantem.

12. Fœtus sustentatione curata a medicis, infantium curæ peritis atque benevolis, maritus lætus tempore justo conspexit uxorem amatam, jam partum edituram, sicut cœlum nubibus obductum, fruges gignere paratum.

13. Tum regina, *SACHI* similis, suo tempore filium peperit, cujus bona fortuna portendebatur quinque planetis, in alto cœlo micantibus, neque solem versus euntibus,—sicut potestas regia, quæ triplicem habet originem, prosperitatem gignit æternam.

14. Plagæ cœlestes gaudebant, venti jucundi spirabant, ignis, cum flamma dextrorsum flexa, sponte sacrificium cepit, omnia illo momento felicitatem portendebant : nam talium hominum ortus universo mundo saluti est.

15. Infantis nobilis splendore innato, circum gynæcei lectum diffuso, subito lucernæ nocturnæ, lumine privatae, quasi pictæ apparebant.

16. Gynæcei famulæ, quæ verbis nectareis nuntium de filio nato attulit, rex tres solum res recusandas esse duxit, umbellam, lunæ instar splendentem, atque duo flabella.

17. Bibit rex pulchram filii faciem oculis, loti a vento securæ instar imotis, neque magna ejus lætitia sibimet ipsi imperare potuit, veluti maris aquarum moles, luna conspecta.

18. Omnibus cærimoniis natalitiis peractis a familiæ sacerdote, qui a sylva sacra advenerat, *DILĪPÆ* filius magis etiam splendebat, sicut gemma, e fodina effossa, magis splendet, postquam polita est.

19. Jucunde sonans instrumentorum solemniū clangor, cum lætis pulchrarum virginum saltationibus, non solum in ædibus reginæ *Magadhensis* mariti, sed in ipsa cœlicolarum habitatione resonabat.